



Siverth K. Heilmann

UPA 2023/161

Atassut

10. maj 2023

Takornariat umiarsuarnik takornariartaatinik tikittut tulannerminni isumannaallisaanikkut akitsuuserneqarnissaannik Naalakkersuisut UKA2024-mi Inatsisartunut saqqummiussassamik inatsisiliornissaat pillugu Inatsisartut aalajangiiffigisassaattut siunnersuut. Isumannaallisaanikkut akitsuutip siunertaraa inupparujussuit umiarsuarujussuarlutik tikittut tulannerminni timmisartukkut tikittutuut periuseq malillugu nalunaarsorneqartalernissaat, nunatsinnilu aningaasaqarnikkut iluanaarutigineqarsinnaalerlutik.

(Inatsisartuni ilaasortaq Aqqalu C. Jerimiassen, Atassut)

Apeqquteqaat aallaavigalugu siunnersuuteqartoq Aqqalu C. Jerimiassen qujaffigeriarlugu Atassummiit naatsumik imatut oqaaseqarfigilaassavara.

Nunatsinni aningaasanik isaatitsiffissatut takornariaqarneq ukiorpassuanngortuni siunnerfeqarsimavugut, taamaattorli annerusumik nunatsinni aningaasarsiornikkut suli initunngilaq. Atassummiit oqaatigillattaajuarpaput siunertaq kusanartoq, siunnerfik pitsaasoq imminik iluatsitsiffiunaviannitsoq naqqaniit suliarinngikkutsigu. Taamatorpiarlu takornariaqarnermut tunngasoq ippoq.

Siunertaq isumalluut, taamaattorli takornarialeriniarlutik nunaminertanik atuisinnaanermut qinnuteqartuortopassuit itigartitaajuarsinnarput. Takornariarmi nunatsinnut tikiinnarneratigut aningaasarpassuarnik iluanaarutiginaviannigilarput, pisassaqtitsinikkut akileraaruteqartarnikkullu sinaakkusersuinngikkutta.

Atassummiillu siornatigulli umiarsuarnik takornariartaatinik tikittut, sulilu amerliartuinnavissut akileraaruteqartalernissaannik oqariartuuteqartuarpugut, aningaasanullu inatsisissamut isumaqatiginninniarnermi ukiorpaalunngortuni aamma kissaatigiuarsimallutigu. Aamma siornatigut akunnittarfinni takornarissat unnuisussat unnuinermut annikkaluartumik akitsuuserneqartarnissaat siunnersuutigisimavarputtaaq.

Massakkullu Aqqalu C. Jerimiassenip siunnersuutigivaa umiarsuarlutik tikittut inoqarfiit mikinernut anginernullu niusarlutillu sinersisut sumiiffimmut tikitaminnut sillimmaniarnikkut akitsuummik taallugu aningaasarsiorfigineqalersinnaanerata isumassarsiaavoq pitsassuaq. Tassami taakku aningaasat sumiiffinni takornariarfiusunut iluanaarutissatut taagaanni sumiiffinnut taakkununga inerisaanissamat isertitaqalluaataasussatullu atorneqarsinnaammata.

Umiarsuarlutimmi takornariartut tassaapput umiarsuarmi sinillutik, nerisaqarlutik, aliikkutassaqartinneqarlutillu pisut. Niugunillu ilaatigut sunnguamilluunniit aningaasartuuteqaratik nakkutigineqaratilluunniit sumiiffinni angalaartarput. Atassummiit siunertaq kusanartuinnaannarnik eqqarsarata, ajornartorsiutaasumillu tikkuaaginnarata aaqqiissutissanik tigussaasunik siunnerfeqartarpugut.

Aajuna siunnersuut tigussaasoq nunatsinni sumiiffinnilu aningaasarsiorfiulluarsinnaasoq, naleqquttumillu annertusilerneqarpat, qanorpiarlu sumiiffinni akiliisitsiniartarnissaq pillugu aqqitassartaa Naalakkersuisut tigussaasunngorlugu saqqummiinissaat kaammattuutigarpugut.

Taamatut oqaaseqarlunga siunnersuut akuersaarparput, pisariaqartinneqarpallu ataatsimiititaliamut innersuusseqataavugut.